

Ista Stori

Mak

14:22-24, 35-36, 45-46, 48-50

15:33-34, 37, 39

16:4-6

Ola difrinwan pipul la dis stori

Storimen

Jisas

Judas

Boswan solja

Yangboi

Ola wekinmen

Yanggel

Storimen: Afta na wen deibin idimbat sapa, Jisas bin gedim det daga, en imbin gibit theingks langa God, en afta imbin breigim det daga, en imbin gibit det daga langa im wekinmen olabat, en imbin tok,

Jisas: “Yumob idim dijan daga, dumaji dijan daga main bodi.”

Storimen: ²³Afta na imbin gedim det kap garram wain, en imbin gibit theingks langa God, en imbin gibit det wain langa im wekinmen olabat, en deibin dringgim det wain, ²⁴en Jisas bin tok,

Jisas: “Dijan wain yumob dringgim im main blad. Ai garra spilim main blad blanga ebribodi blanga opinimap det nyubalawei blanga God.^e

²⁵Trubala ai dalim yumob. Ai kaan dringgim dijan wain garram yumob enimo. Bat wen main dedi jandimbek mi, en ai jidan boswan brabliwei, det taim na ai garra dringgim det wain nyubalawei.”

Storimen: ³⁵Brom deya Jisas bin go nomo longwei brom detlot thribala wekinmen, en deya na imbin buldan garram im feis langa graun, en imbin prei langa God blanga deigidawei det trabul brom im. ³⁶
Imbin prei,

Jisas: “Main dedi, ai sabi yu gin dum enijing yu wandim. Wal yu nomo meigim mi dai. Bat yu nomo dum wanim mi wandim. Yu garra dum wanim yu wandim.”

Storimen: ⁴⁵Wal wen Judas bin kamat deya, streidawei imbin go langa Jisas, en imbin tok,

Judas: “Titja!”

Storimen: En imbin kis langa im, ⁴⁶en detlot pipul bin grebum im, en deibin holdim im adbala.

⁴⁸Afta na Jisas bin tok langa detlot pipul,

Jisas: “Mi nomo trabulmeika. Wotfo yumob bin kaman garram naif en stik blanga grebum mi? ⁴⁹Ebridei aibin oldei titjimat yumob deya langa det Serramoni Pleis. Wotfo yumob nomo bin grebum mi deya? Ai dalim yumob wotfo. Yumob nomo bin grebum mi deya, dumaji God bin tok langa oltestaman dijan ting garra hepin lagijat na.”^h

Storimen: ⁵⁰Wal ol detlot wekinmen blanga Jisas bin ol libum im na, en deibin ol ranawei. ⁵¹Wan yangbala men bin deya bulurrumbat Jisas. Imbin jis werrimon im slipinwan klos, en detlot pipul bin trai en grebum im du. ⁵²Bat imbin ranawei, en imbin libum im klos deya gin langa olabat bingga, dumaji deibin bradinim im.

³³Bambai na wen imbin dinataim, det san bin go dakbala, en det kantri bin jidan dakbala raidap aftanun kabaditaim, ³⁴en wen imbin aftanun kabaditaim, Jisas bin jingat adbala garram im ron langgus,

Jisas: “Ilai, Ilai, lama sabaktani?”
“Main God, main God, wotfo yubin libum mi?”^e

Storimen: ⁷Wal Jisas bin jingat adbala wanmo, en afta imbin dai.

³⁹Wal det boswan solja hubin jandapat deya wotjimat detlot kros bin luk hau Jisas bin dai, en imbin tok,

Boswan solja: “Trubala dijan im san blanga God!”

Storimen: ⁴Wal wen detlot gel bin kamat langa det greib deya, deibin luk det bigwan ston nomo bin deya langa det dowa,

⁵en deibin gowin insaid langa det keib, en deibin luk wanbala yangboi deya. Det yangboi bin werrimon longwan waitwan klos, en imbin jidanbat raidensaid langa det keib.

Wal detlot gel bin gida shok brabliwei wen deibin luk det yangboi deya langa det dowa, ⁶en det yangboi bin tok langa olabat,

Yangboi: “Yumob nomo bradin. Ai sabi hu yumob lukabat. Yumob lukabat det bodi blanga Jisas brom Nesareth. Imbin dai langa det kros. Bat imbin gidap laibala na. Yumob luk det pleis weya deibin pudum im bodi. Im nomo deya.”